

Transkription von Urkunde HRO 1393c

Ort, Datierung: Rostock, 1393-03-05

Signatur: Stadtarchiv Rostock, U 3, K, Schulden, IE U 3k 1393 März 5 [\[online\]](#)

Inhalt: Rat der Stadt Rostock: Schuldbrief

Wi borgermest(er)e vnde Radma(n)ne to Rozstok bekenne(n) vn(de) betughen openbare Jn desme
iegenwordige(n) breue vor vs vnde / vzen nakomelinge(n) indeme zulue(n) rade dat wi schuldich synt
von rechter schult . den Erliken luden . alze vicke de/steden hans heruorde vnde cord nutberge to
lubeke like houedlude(n) vn(de) Ere(n) Erue(n) twehundert Rozsteker mark / vn(de) veer vnde
souentich mark der zulue(n) mu(n)te de wi vnde vze nakomelinge Jn deme rade to Rozstok
vorb(e)n(omed) sco=/len vnde willen betalen to sunte michaelis daghe negest tokome(n)de to dancke
myt vnbeworne(n) reden pe(n)nyng(e) / Alle desse vorscreuene stücke . loue wi borgermest(er)e vnde
Radma(n)ne to Rozstok vorb(e)n(omed) myt vze(n) nakomelinge(n) / in deme suluen Rade . den
Erbenomeden erliken ma(n)ne(n) vicke desteden hans heruorde Cord nutberge vn(de) Eren / Eruen
stede vnde vast to holdende sunder ihenigerleye argelist . vnde en to truwer hand . den Erlike(n) luden
./ hern ioha(n)ne hoyers borgermestere to hamborgh . Jorden pleskow Radman to lub(eke) . vnde
mathies van borken / borghere to Rozstok To mererer bewarynge vnde to tuchnisse so hebbe wi vs(er)
stad rozstok Jngesegel heng(et) / laten vor dessen bref de gheue(n) vn(de) screue(n) is na godes bord
drutteynhundert iar Jn deme der vnde nege(n)te/gesten iare des mydwekens na Remi(ni)scere
mise(r)ationu(m) /